

*Flores* solitarii, axillares; pedunculati: pedunculus folio sæpe longior, in medio duabus bracteis acutis instructus, supra quos post florescentiam reflectuntur tandemque cadunt.

*Color* floris purpureus.

*Capsula* sæpe solum disperma vel trisperma est.

*Styli* singuli e medio bifidi sunt.

*Habitat* in CUMANA copiose.

2. CONVULVULUS foliis linearibus acutis, caule procumbente.

Prioris forte varietas est. Differt foliis longe angustioribus, habitu glabriore & floribus minutissimis, pallide purpureis.

3. CONVULVULUS foliis oblongis acutis, caule erecto, hirsuto, floribus subsessilibus.

*Radix* fibrosa, annua.

*Caulis* erectus, digitali-spathamalis, hirsutus.

*Folia* oblonga, acuta, erecta, sessilia; pilosa.

*Flores* axillares, solitarii, breve pedicellati: pedicello hirsuto, basi ad alas foliorum bracteolis setaceis pilosis.

*Calyx* pilosus.

*Corolla* obsolete quinque-dentata, quinqueplicata.

*Styli* quatuor vel duo, prope basin bifidi.

*Capsula* tetrasperma.

Character itaque præcedentibus communis fit.

CAL. *Perianthium* monophyllum erectum: foliolis oblongis, acutis, concavis; persistens.

COR. monopetala, rotata: *Tubo* cylindrico, brevi, calycis altitudine, sursum paulo ampliore; *Limbo* plano, patente, amplo, decem incisuris parvis, emarginatis notato, obsolete quinquaplicato.

STAM. *Filamenta* quinque, setacea, apici tubi imposita, paulo inæqualia. *Antheræ* oblongæ.

PIST. *Germen* ovatum, parvum. *Styli* duo, patentes, setacei, singulus mox bifidus, staminibus longior. *Stigmata* quatuor, obtusa.